



16. novembari 2009

Inatsisartut Suleriaasianni § 36, imm. 1 naapertorlugu matumuuna Naalakkersuisunut apeqqutit imaatut nassiuppakka:

**Naalakkersuisunut apeqqutit: Ilumoorpa Paamiuni innaallagissiorfiliortoqarnissaanut atatillugu Inuussutissarsiutit pillugit inatsimmi aalajangersakkat saneqqullugit suliffeqarfik Qallunaat Nunaanneersoq Naalakkersuisut sulisinniaraat, saneqqutilersaarlugilluunniit suliffeqarfik Qallunaat Nunaanneersoq Naalakkersuisut sulisinnialeraat?**

**Ilumoorpa suliffeqarfik immikkut piumaasaqaateqarluni nunanit allamiunik sulisoqarnissanissani qinnutigisimagaa, takuuk Inatsisartut Inatsisaat nr. 27, 30. oktober 1992-immersoq?**

**Naalakkersuisut isumaqarpat taamatut immikkut piumasaqarneq suliarinnittussarsiuusarnermi malittarisat atuuttut malillugit iliornerusoq? – taamaattoqarsimappat qanoq tamanna aningaasalersorneqassava?**

**Naalakkersuisut isumaqarpat nunatta aningaasaqarniarnera eqqarsaatigalugu aalajangiineq isumatusaarnerusoq, tassami neqerooruteqartut akikinnerpaartaata tulliatalu assigiinngissutaat 4%-ip missaaniimmat?**

**Naalakkersuisut nassuiarsinnaavaat uani pineqartumi inuussutissarsiutit pillugit inatsimmi immikkut akuersinissamut suut tunngaviunersut?**  
(Inatsisartuni ilaasortaq Kim Kielsen, Siumut)

**Tunngavilersuut:**

Paamiuni inaallagissiorfissap maskiinanut, innaallagissamut automatiskimillu ingerlasinnaneranut tunngasortaasa suliarinnittussarsiuunneqarneranni suliffeqarfiit Kalaallit Nunaanneersut marluk Qallunaat nunaanneersorlu ataaseq aggeqqusimavaat. Suliffeqarfik Qallunaat Nunaanneersoq aggeqquneqarsimavoq, naak inuussutissarsiutit pillugit inatsimmi piumasaqaataasoq, tassalu aalajangersimasumik Kalaallit Nunaanni ingelataqareersuunissaanik piumasaqaat naammassisimangikkaluarlugu. Tamanna aallaqqaataaniilli Nukissiorfiit ilisimareertussaagaluarpaat, suliffeqarfilla ilisimatillugu suliariumannittussiuussinermi suliarinnissinnaasutut neqeruulersigani Kalaallit Nunaanni immikkoortortaqaalereersimasariaqarluni taamaanngippallu suliaqarsinnaasutut neqeroorsinnaanani.

Neqeroorutit apuummata suliffeqarfiup Qallunaat Nunaanneersup suliffeqarfiullu Kalaallit Nunaanneersup aningaasartaasa nikingassutigaat 4% missiliorlugu, suliarineqartussap 20 millioner koruuninik aningaasartaqartussap iluanni, takuuk suliarinnittussarsiuussinermi imaqarniliaq. Suliffeqarfiit neqerooruteqartut assigiinngitsunik immikkut piumasaqaateqarput, tamannalu qaqutigooortuunngilaq. Uanili qaqutigooortuuvoq, suliffeqarfik Qallunaat Nunaanneersoq immikkut piumasaqaateqarluni sulisoriniakkani nunamit allaminngaannersuunissaat akuereqqummassuk. Immikkut piumasaasoq taamaattoq naatsorsorneqarsinnaanngilaq, tassa suliarinnittussarsiuussisarneq pillugu inatsimmi piumasaqqatit iluanniigani, taamaammat neqeroorut tunuartinneqarsimasariaqaraluarluni.

Apeqquteqaatika aqutigalugit paaserusuppara soq suliffeqarfiit Kalaallit Nunaanneersut marluk inatsisinik eqqortitsisuullutik ajugaatinneqannginnersut, akerlianillu suliffeqarfik Qallunaat Nunaanneersoq immikkut akuerineqanngikkuni Nunatsinni suliaqarsinnaanngitsoq saalliutinneqarsimansoq, taassumalu saniatigut sulisussanik nunani allamiunik sulisoqarnissani kisiat siunniullugu.